



ATASSUT INATSISARTUNI

ATASSUT

UPA15/63-1

Siverth K. Heilmann

24.03.2015.

**Inatsisartut aalajangiiffigisassaattut siunnersuut Naalakkersuisut peqquneqassasut
Nukissiorfinnut nalunaaruteqaqqullugit, akinut suliffeqarfiup allattorsimaffiani allaqqasut
allanngortinneqassasut, siunissami ima allassimalerluni innaallagissamut atuisut nunami
aalisakkanik suliffissuarnut innaallagissamut akikillisaaffigisaraat aammalu imermik atuisut
nunami aalisakkanik suliffissuarnut imermik akikillisaaffigisarai, maannakkutut
ikkunnaarluni Nuummiunerusut ataatsimoorullugu kiassarnermik atuisunit
akilerneqartarunnaarsillugit.**

(Inatsisartunut ilaasortat, Siverth K. Heilmann aamma Steen Lynge, Atassut)

Nunatsinni isertitakinnerusortavut inuuniarnikkut aningaasatigullu toqqammavigissaarnerullutik
inuuneqarsinnaanissaat tamatta aqqtissiuukkusoqaarput.

Taamaattorli naalakkersuinikkut oqaatsinit kusanartuniit timitaliinissamut ilaatigut
kigaappallaarsorinartumik alloriarumaataartarpugut, ajoraluwartumik!

ATASSUT-mit qularutiginngilluinnarparput matumani siunnersuuterput nunatsinni sumiiffinni
arlalinni, pingaartumik maani Nuummi innuttaasut isertitakinnerpaat akornanni inisisimasut
naapertuilluartumik aaqqiiffigineqarsinnaasut siunnersuutitta matuma akuersarneqarneratigut.

Siunnersuuterpummi manna Inatsisartuni partiit sinnerisa ilassilluarsinnaappassuk suliffissuarnut
imermut innaallagissamullu akikillisaataasartut isertitakinnerpaat kisimik akilersornagu
inuaqatigiinni naapertuilluarnerusumik inoqutigiiit tamatta innaallagissamik imermillu atuinitssinnik
akiliisarnerput aqqtigalugu akilertalissagatsigu, kiassarnermut akiliutit aqqtigalugit
inissiatoqarsuani kiassaruminaareeqisuni nalinginnaasumillu isertitakinnerpaat
angerlarsimaffigisaannit taamaallaat aallernata.



ATASSUT INATSISARTUNI

ATASSUT-mit naqissuserlugu erseqqissassavarput suliffissuarnut akikillisaatit minnerpaamilluunniit innarlerniannginnatsigit, nunatsinnimi inuussutissarsiornermik ingerlataqartortatta nunanut allanut unammillersinnaassuseqarnerat uagutsinnut pingaaruteqarluinnarpooq.

Matumaniuna aqqutissiuukkusukkippus pingaartumik utoqqalinersiallit, siusinaartumik sulisinnaajunnaarnersiutillit, pisortanit pilersorneqartut, SIK malillugu akissarsiaqartut allallu namminneq angerlarsimaffigisaminnik piginnittuunissaminut periarfissaqanngitsut, taamaammallu pisortat inissiaataanni attartortittakkani inissiarsuarni anginerusuni mikinerusunilu ineqartut ungasianiit kiassarneqartut kisimik akiliisinneqartarunnaarlutik tamatta nammaqatigiilluta akiliisalissasugut.

Eqqaamaneqartariaqarportaaq inissiatoqarsuarni tamakkunani aserfallassimaneq ima annertutigisarmat aammalu oqorsarnerlugaanerat ima annertutigimmat taamaattuni najugaqartut angerlarsimaffitik kiassarniaraangamikkat, ajornerpaagaangat kiak pilersitaq iluaqutaaniartussaagaluaq iluaqutaanani silaannarmut siamarneqartarmat, taamaalillutillu inissiani taamaattuni najugaqartut kiassarnermut akiligassaat immini annertoorujussooreermat, tassalu ullumikkutut itsillugu suliffissuit akikillisaaffigineqartarnerannut kisimik akiliisinneqartarlutik.

Tamatuma saniatigut ATASSUT-mit ilisimavarput inissiat arlariinnik angerlarsimaffitallit ungasianiit kiassarnermik pilersorneqalersinnaagaluartut akisuallaqimmat kissarsuutinik uuliatorunik atuinermut suli akisunerusinnaasunik atuisuusariaqartut, uffa massa nunatsinni ikuallaaviit Nukissiorfillu kiassarnermik sinneqartoorutiminnik silaannarmut eqqaasartut.

ATASSUT-mit neriuutigilliunnarpalput kinguarsaanertaqanngitsumik aammalu allanik pissutissarsiorneraqanngitsumik innuttaasut matumani eqqartukkavut oqilisaanneqarnissaannut, maluginiarparput Naalakkersuisut itigartitsigaluarlutik qulaajaaqqaarumasut, oqaatigeriikkatsitulli ATASSUT-mit kissaatigaarput suliaq kinguarsaanertaqanngitsumik ingerlanneqassasoq, tamannami assigiimmik akeqartussaatitaanerup atorunnaarsinneqarneranut attuumassuteqanngimmat, naapertuilluarnerusumilli nammaqatigiinnissaq aqqutissiuunniarneqarmat.



ATASSUT INATSISARTUNI

Taamatut oqaaseqaateqarluta ATASSUT-mit inassutigissavarput siunnersuut akuersaartumik suliarineqassasoq aappassaaneerneqartinnagulu Inatsisartut ataatsimiitaliaanni susassaqartumi suliassanngortinneqassasoq.